

第〇九二冊

方輿彙編

職方典

開封府部

卷一
三

古今圖書集成

中華書局影印

欽定古今圖書集成方輿彙編職方典

第三百七十一卷目錄

開封府部彙考二

開封府山川考



職方典第三百七十一卷

開封府部彙考二

開封府山川考

本府 附符 縣 附郭

府志

夷山 在府城安遠門內亦名夷門山以勢平夷故名乃魏侯羸監守之處唐胡曾詩六龍冉驟朝昏魏國賢才杳不存惟有侯羸在時月夜來猶自照夷門

龍亭山 在府城一名煤山明太祖封周藩於

開封築土山於王宮後建亭閣列花石明末廢

皇清康熙三十一年新建

萬壽亭於其上

艮嶽 在府城東北詳見古蹟

獨樂岡 在府城東十五里昔有富翁了婚嫁

日邀故舊飲酒爲樂徵宗徵行見而羨曰此人

其獨樂哉故名

鳳城岡 府城西南十里許世傳金章宗時有

鳳凰集於此亦名鳳凰岡

彭子岡 在府城南元劉哈刺不花屯兵於此敗類毫盜兵

望牛岡 在府城西南十三里

潘岡 在陳留東北四十里宋潘美嘗居此故名

鸞鷺岡 在通許東南四十里昔有彩鳥集於上見古蹟

桃陵 在杞縣東南十里隱隱有隆起狀昔張

巡夜擊賊於白沙澗至桃陵遇賊救兵悉擒之即此

長白山 在太康縣東北一里

五鳳山 在尉氏縣南聖井之北

牛脾山 在洧川西南十里有大窪澗兩崖義

業爭高中有坦途可容方軌卽鄭莊公與母相見處俗呼爲遇母岡上有穎考叔祠

赤坂岡 在洧川東南二十里土藉色望之如丹丘

彭祖岡 在鄆陵縣北俗傳彭祖葬此

三晉岡 在扶溝西北二十五里相傳春秋時

三晉大夫帥師於此

雕陵岡 在扶溝北二十里有鄭莊公祠弘治

間得志石云前有雕陵嶼嶼後背大川烟霞

翠屏山 在扶溝儒學前與城相連

牟山 在中牟北五里上建牟山廟縣之得名

以此

清風嶺 在中牟東南二里許其高數仞綿互

十數里

土山 在中牟南三十里

馬陵岡 在中牟西南綿互五十餘里史記韓

懿侯二年魏敗我馬陵卽此

中嶽 在陽武西北二十里

黑洋山 在原武北二十里連陽武界昔沒於

河至今河岸猶有山脚隱隱

黑山 按史漢獻帝初平四年曹操軍鄆城荆

州牧劉表斷袁術糧道術引軍入陳留屯封丘

黑山餘賊及於扶羅等佐之曹操擊破之術退

保封丘舊以封丘黑山連而爲句遂謂封丘有

黑山不知黑山乃常山賊帥張燕之名號也今

正之

淳于岡 在封丘東北十八里

酸棗山 延津西南十五里今名土山屬陽武

白雲山 在蘭陽西十五里土山無石每且有

白雲上騰故名山下有黃風洞洞幽且長莫知

所底舊傳爲張子房辟穀處

張成山 在白雲山東南周圍三里或云子房

舊居

黃陵岡 儀封東北五十里接山東曹縣界曹

操立疑塚於此

具茨山 在新鄭西南四十里一名大隗山山

海經謂之大隗山又水經注黃帝登具茨之山

升於洪隄上受神芝圖於黃蓋童子卽是山也

潁水出其阿而流爲陂俗謂之玉女池今其山

有軒轅避暑洞又其巔有風后嶺下有白龍湫

陘山 一統志作邢山在新鄭西南三十里史記魏襄王六年敗楚師於陘山即此山上有鄭祭仲墓墓西有子產墓墓石爲方墳墳東有廟並東北向鄭城杜預謂不忘本故也廟有枯柏其鹿根故株之上多生稚柏列秀青青望之可愛此山與具茨並峙

自然山 在新鄭西二十五里有軒轅飲馬泉

抱犂山 在新鄭北三十里有駐節臺相傳宋陳堯佐所築

黃崖 在新鄭北十里春秋傳云魯襄公及諸侯之楚過鄭鄭伯有迎勞於黃崖即此

西銘山 在陳州西北五里

宜山 在西華南三十里褚河北岸戰國時大梁邑名以其城在山之南也

廟陵岡 在西華西四十里楚靈王章華臺故址

思都岡 在西華北二十里女媧氏之遺民思故都故名

頓山 在項城北五十里即古頓子城

乳香臺 在沈丘西南二里昔產乳香故名

首山 在襄城南五里橫亘九里史記稱天下名山八五在中國皆黃帝所嘗遊首山其一也又云黃帝採首山之銅鑄鼎於湖莊周謂黃帝登具茨訪大隗命駕於襄之野七聖皆迷無所問途見童子而問道焉即此山也爲今武紫雲仙翁諸山之首故曰首山明賈誼詩路出名邦

渺樹煙首山橫帶馬蹄前身經七聖皆迷地望入諸峰衆妙天靜裏高寒真可愛故人凋謝不堪憐等閒又負登臨興笑指雲林一絮然

令武山 在襄城西南五里舊傳楚令武將軍景差葬此因以名山今有令武將軍祠在焉

紫雲山 在襄城西二十五里其山峰巒翠樺林木蒼鬱自中峰而下重巘疊嶂如納陸然南北兩山左右環拱一泉從中湧出旋遶東北入汝水襄山第一奇觀也明李恭靖公敏建書院於上賜額紫雲書院一名書院山明馬文昇詩翠嶽孤峰上插空宛然削出玉芙蓉四時雲氣春偏盛釀作甘霖濟歲豐

龜山 在襄城西南十五里山形如龜因名有二井遇旱禱雨輒應一名靈泉山

高陽山 在襄城西南十五里山麓多泉足滋灌溉

仙翁山 在襄城西南十八里迥出羣峰襄山之最高者上有丹井俗傳葛仙翁舊跡

駱駝嶺 在襄城西二十里旁高中下狀如駝背故名

召陵岡 在鄆城東三十五里旁有召陵城即春秋齊桓公盟於召陵地

東紫岡 在鄆城東三十五里土色紫翠森秀與西紫岡對峙

西紫岡 在鄆城西南十五里

宋岡 在鄆城西北十五里旁有青城城紫荆山 在長葛西五十里與禹州相接西北

屬禹州東南屬長葛小洪河發源於此

鳳凰岡 在長葛西北十五里漢黃霸治潁川時鳳一集於此故名

大鴻寨山 在禹州東北四十里即具茨之別峰與密縣新鄭相錯昔黃帝臣大鴻氏屯兵於此故名

太白山 與大鴻山相接

牧牛山 在禹州東北下有九十六泉漆之上源也

孝山 在禹州東北五十里俗傳有黃香墓故名

馬鞍山 在禹州東北六十里即陘山有子產墓其陰屬新鄭

金牛山 與陘山接壤

黃臺岡 在禹州東北魏志陽翟有葛溝水黃臺岡

大磚山 在禹州北二十里元隱士張克己號大磚取此

六盤山 在州北十里

大陽山 在州北有李崆峒墓

杏山 在州北二十里有澗名張翁漢仙人劉根所棲隱者

明山 在州北五十里明周定王葬於此是爲九龍口九溝相合水聚故也

荆山 在州西北五十里洛陽記齊武帝採玉於此亦臨潁水

崆峒山 在州西北五十里山前有觀名逍遙

盤旋而上懸崖絕壑石澗瀑布淙淙有聲爲一郡之勝舊志云黃帝問道於廣成子處按史記黃帝披山通道西至崆峒其山在陝西今據莊周所云命駕於襄城之野禹州近襄或卽在此地與

殿山 在州西北六十里

柏尖山 近殿山

大龜山 在州西北五十里

大仙山 在州西北五十里相傳軒轅修煉於此

大龍山 在州西北六十里有五代漢高祖陵

小龍山 潁水經其下

玲瓏山 一名輞山石皆玲瓏山腰有石洞嵌空幽邃郡人張南溟建書院於其地

書堂山 州西北四十八里相傳古人聚書處

逍遙山 在臨潁水有漢中郎將墓摩崖作碑字多剝落失考

雪山 在州西北六十五里

三磴山 在州西五十里若三磴上下皆有龍潭

神后山 一大劉山在州西六十里其土可陶有漢高祖廟明周世子於此獲騶虞

方山 在州西有大尉塚樹柏猶存失考

乾鳴山 在州西六十里

夾龍山 在州西四十里

鳳翅山 在州西三十里

禹山 舊志在州北潁水之南下有禹廟在州

西南宋元豐間重修北魏史曰陽翟縣有禹山祠此其是矣

三峰山 在州西南二十里有宋庠墓金陳和尚與元兵戰潰於此明督師孫傳庭拒李賊前鋒亦潰於此

皇清沈荃詩秋色三峰麗揚鞭指翠屏晴巒迷近遠

錦樹雜丹青笳吹林間發霜砧野外聽憑高聊

放眼髣髴對山靈護護山風起蕭蕭木葉乾詞

人揮玉腕候騎簇金鞍谷咽疎鐘動天空過鴈

寒高驗猶未倦微月上林端

九山 在州西南三十五里

呂梁山 塘口河源出其下

柏山 在禹州東南其峰秀出與三峰山東西

相望

青屏山 在密縣北八里其形若屏

雲壘山 在密縣北三十里一名侵雲山三峰

特起勢插雲表

開陽山 在密縣西北十五里冬雪降卽消

龍巖山 在密縣西北二十五里起伏連延其

勢如龍有寺曰龍巖中有甘露泉

香爐山 在密縣西二十五里上有元帝廟土

人呼爲小頂

橫山 有二一大一小俱在密縣西北三十餘

里東西相對

大方山 在密縣西北五十里山漸高大林木

森秀下有緩谿緩水出焉

香峪山 在密縣西北五十里有上中下三峪

山多產藥卉中峪有虎跑泉

蘭巖山 在密縣西北接汜水西南境唐詩鼓

吹註昔有密人蘭公夫婦死於此化鶴飛去至

今巖下有石成對形如雙鶴

織錦洞 在密縣西北五十里

鳳凰山 在密縣西四十里嘗有鳳集其上故

名

火門山 在密縣南三十里有洞豁然向離因

名

柏崖山 在密縣南三十里古柏成林下有龍

湫俗訛熊耳山

承雲山 在密縣東南三十里土人呼爲破荆

山據水經有東西承雲二水出其下流逕超化

寺前則今之破荆卽古之承雲也山巔有石天

將雨則雲霧先出

七敏山 在密縣東南西連承雲脈落相貫

超化山 在密縣東南與承雲相接有超化寺

洧水出焉

石樓山 在密縣東北十八里其山高峻重疊

狀若樓然

靈巖洞 在密縣東四十里

梅山 在鄭州西南三十里高數十仞周數里

其脈來自嵩嶽爲州鎮山或謂舊多梅花故名

下有龍池小金水河源於此 按明一統志春

秋楚爲子馮率師侵費滑還師於此

泰山 在鄭州南四十里以其能吐雲不亞岱

宗之膚寸而合亦名泰山與梅山東西斜對較

梅山爲尖秀三面陡絕不可躋攀惟南隅疊石可登上有泰山三仙二廟縱目遠眺雲樹蒼茫諸村落皆歷歷可指奇觀也

廣武山 在滎澤西十里與三皇山連上有東西廣武二城即楚漢屯兵相拒處其山西跨河陰南跨汜水綿互五十里峰巒尖秀峭拔數十丈朝霞暮烟變態萬狀宋劉景文詩楚漢兵相接乾坤甚亦嘆虎爭千里震龍關四郊腥故壘誰從問嚴祠自昔靈北風吹敗木落葉任飄零副使沈荃詩晴秋振展層峰上壁壘風雲萬里開山合嶠函爭北向河連汾沁却東來寒沙白磧埋遺鐵衰草青燐長廢臺帝業霸俱泯沒阮公千載有餘哀

嶽山 廣武山北枕黃河南臨陡澗人稱小桃源
五龍峰 在嶽山頂五峰對峙秀氣鍾焉
嵩渚山 在滎陽東南二十五里一名小陘山京水出焉

萬山 在滎陽南二十里嵩渚山之西須水出焉
清水嶺 在滎陽東南紫水出於此
賈峪山 在滎陽東南賈谷水出焉
大周山 在滎陽南三十五里汴水之源宋仁宗曹皇后建塔於上中有三泉九峪
傘蓋山 在滎陽南四十五里峰形如傘故名一名摩旗山韓信伏兵於此山頂有旗穴在焉
石棚山 在滎陽南三十五里一石平坦如盤

其下空洞如屋可容數十人故云石棚
靈源山 在滎陽西其山嘗出靈芝石菌石髓紫菊往往人聞山上有長嘯聲

敖山 在滎陽北河陰西詩搏獸于敖是也商仲丁遷都於此左傳晉師救鄭在敖郕之間呂東萊曰士季設七覆於敖秦時築敖倉於上因以名山漢酈食其勸高祖據敖倉之粟又因敖山築甬道下汴水皆在此
牛口峪 在河陰西北二十五里與汜水接壤唐太宗擒竇建德之處

運斗峪 在河陰西北二十里俗傳張子房觀星望斗處今運斗臺猶存
秦王頂 在河陰西北十八里平闊數畝唐太宗驅竇建德處今有秦王寨
摩旗頂 在河陰西北十一里相傳樊噲曾摩旗其上因名今漢高帝廟猶存

招子頂 在河陰北十六里王陵以兵屬漢項王欲挾之歸楚取陵母置軍中遣使招陵陵母私對使者泣曰願爲妾語陵善事漢王王長者終得天下毋以老妾故持二心遂伏劍死
太公頂 在河陰東北十四里即項王欲烹太公處在廣武山之巔

三皇山 即廣武山之別名東與滎澤相連按明一統志其上有東西廣武二城爲楚漢屯兵相拒處
石櫛谷 在河陰東北二十里盈山皆安石櫛參差翳翳不計其數

大伾山 在汜水城西一里考大伾在滎陽宋史以爲卽今成臯其山有大澗九曲又名九曲山上有呂布城或云成臯舊城

伏蛟山 在汜水西二里許唐會昌三年建昭武廟於其上祀歷代君臣有事於虎牢者元季廢

方山 在汜水南四十里汜水出焉山海經所謂浮戲之山也周圍數百里環繞數縣
五雲山 在汜水東南四十里其山嵯峨如浮圖又名塔山雪霽則絮爛如玉樹然

三山 在五雲山東六七里山有三峰
紫金山 在五雲山南十五里有伏羲廟其西曰白玉嶺有女媧祠宋程顥詩仙掌遠相招縈紆度石橋暝雲生澗底寒雨下山腰樹色千層亂天形一罅遙吏紛難久駐回首羨漁樵

分水嶺 在五雲三山之間南有桃花泉北有竹葉河因名
金龜山 在汜水東郭堤外宋人嘗建美哉亭於其上元末毀

蓼子峪 在汜水西北大伾山之中
狗脊山 府志無按明一統志在汜水縣東上產黃麻

伯牛岡 府志無 按明一統志在汜水縣東北三十里有冉伯牛廟

水
黃河 源出崑崙西南二千里星宿海北流塞外由山西境而南至潼關入河南境至汜水入

開封府境歷河陰榮澤鄭州原武陽武中牟祥符封丘陳留蘭陽儀封至考城入歸德府境宋太平興國十年河決榮澤始南徙奪汴水之道以注於淮金明昌五年河決新鄉由太康逕陳州至潁州元末又自通許分一支自陳州商水入南頓混潁水東流於淮水明洪武二十四年河決原武經汴城東南至陳州城西南經項城入淮宋徽宗九年入故道正統十三年又決榮陽經陳州項城入淮弘治間又北徙崇禎十六年河決入渦河

皇清順治九年河自復故道 按明一統志黃河舊在府城北四十里自西北汜水縣入境東至虞城縣下達山東濟寧州界洪武二十四年決原武縣黑陽山下東經府城北五里又東南至項城縣出境入淮而故道遂淤永樂八年復疏入故道自是河分為二正統十三年又決榮陽縣東經府城西南又東南至項城縣出境入淮而城北之新河又淤元陳孚詩千載金湯擁上流只今惟有荻花秋江南客子笑無語閒看黃河繞汴州

蔡河 源失考宋時為漕渠歲漕上供水六十萬石入京師兼閘水洧水渙水以通舟楫閘水自尉氏歷祥符合於蔡是為惠民河洧水自許田注鄆陵東南歷扶溝合於蔡渙水出鄭之大隗山注臨潁歷鄆陵扶溝合於蔡凡許鄭諸水悉會焉猶以其淺涸故植木橫棧及設斗門以節水建隆三年詔發丁夫數萬浚蔡水入潁其

自尉氏北流至汴戴樓門東由廣利水門入城名西蔡河接閘水緣繞城內其從陳州門西普濟水門出城流經通許復接普濟河名東蔡河即所謂惠民河也元至元二十七年河決祥符西蔡河上源由是塞明洪武以來河屢南徙淤為平地惟府城南薰門內東西有河積水不通舟楫尚存東西二橋崇禎末河決汴梁併橋亦淪沒

六丈河 在府城北封丘門外世傳宋時恐河水為患故開此河以殺其勢今湮

廣濟河 在府城安遠門外亦宋之漕渠一名五丈河唐武后延載元年引汴水入白溝接注湛渠以通曹濟兗鄆之賦因其闊五丈故名唐末湮廢後周顯德四年修復至宋太宗改名廣濟歲漕東北上供水六十二萬石入京師於京城之西夾汴水造斗門引京索蔡河水通城濠入斗門俾架流汴水之上東進於五丈河以便漕運水門三上曰咸豐下曰善利上南曰未順元初淤塞

金水河 一名天源本京水導自榮陽黃堆山其源曰祝龍泉宋建隆二年鑿引水過中牟名曰金水河抵汴城西其水橫絕於汴設斗門入浚溝通城濠入於五丈河後淤塞按明一統志在鄭州城西南二十五里

汴河 本作汴即浚義渠也一名荻蕩渠源出榮陽大周山下受西南諸山谿京須索鄭之水東流至中牟縣北與沙水同流東南至浚義而

分一瀆南注為沙一瀆東注為汴漢平帝時黃河南奔衝汴明帝永平中命王景修汴隄渠目榮陽東分疏河汴二水令黃河東北流入海汴河東南流入泗隋大業元年開通濟渠自板渚引河歷榮澤入汴又自大梁之東引汴水入泗達于淮渠廣四十步渠傍皆築御道樹以柳名曰隋堤一日汴堤宋定都汴梁汴水穿都中有上水門下水門歲漕江淮浙湖之粟六百萬石達京師常至決溢設官司之元至元二十七年黃河決始淤塞舊府治南有汴渠故蹟即其地也止存今沙河一名賈魯河又名小黃河受京須索鄭諸水經朱仙鎮呂家潭至扶溝東北受雙洎河水又東南入西華境達城西北東三面又東南經李方口西又東南合潁汝二河入商水境逕周家口又東受清水及柳莊河水為白馬溝其南為潁岐口沙水東流潁水東南流逕南頓鎮又東南逕項城北受潁水汾水又東入沈丘境至潁州復與沙合沙東逕槐坊店折而東南受枯河水又東逕紙店界首集入江南太和縣東由潁北合注於淮唐李益詩汴水東流無限春隋家宮闕已成塵行人莫上長堤望風起楊花愁殺人

伯俞河 在府城西三十里韓孝子伯俞居此巴河 在陳留北三十五里明楊一清詩一帶巴河縱復斜孤帆疑是泛星槎東吳萬里雲濤外過盡春山直到家按明一統志東入寧縣界伊水 在陳留東北二十里環繞伊尹故里

睢水 在陳留東北四十里又名隄河按明一統志東經睢州達寧陵縣

鐵裏河 在杞縣西南三十五里

清河 在太康縣南

雙洎河 在溱洧二水並流逕新鄭縣城南又東受黃水又東受南濮北濮二水又東南受龍淵水又東南受稟水逕長葛縣城至東南郭折而北流入洧川界復東受清泉水又東南逕洧川城南受大洧水又東南逕新汲故城北東南入鄆陵界又東北入扶溝界東注於沙河即汴

河按明一統志在洧川縣南即溱洧二水之下流

馬蹄河 在蘭陽北五里一名清河明楊一清詩春濃官柳颺東風隔岸歌聲款乃中欲向滄浪同濯足誰清誰濁問溪翁

黃水河 在新鄭北十里東入於洧

穀河 源出商水西召陵岡流經項城縣入淮

虹河 項城舊西漢漕河舊闊十餘丈歷城內下達潁水

潁河 在許州北八里源出密縣大隗山名魯固河又名清流河東南入長葛境逕許州至臨潁縣入於潁水

石梁河 在許州西七里源出密縣山谷中流至超化寺前匯為黑曰二龍潭其深莫測東流至禹州郭連里逕石固寨南有石梁橋為許州長葛分界流入臨潁北境又名五汲河東至西華界入潁水宋名石塘河漕運許州一帶之粟

達於汴京按明一統志在臨潁縣北三十里東南入黃河

清流河 源出許州東秋湖流經鄆陵西華二縣界入於潁

潁河 源出登封潁合中東流經禹州又名稽河按漢書以陽翟大賈褚姓所居故名東過臨潁受潁水又東至西華受石梁河水經縣東南合汝水又東南入商水境合沙水逕周家口漸達於淮按明一統志東經鄭州至襄城縣為渚

河

襄祇河 臨潁北三十五里潁河之支流也魏襄祇屯田許下引流灌溉得穀百餘萬斛因以名河

五里河 臨潁北五里潁河支流

艾城河 臨潁東北三十里石梁河之北魏鄆艾屯田引潁水為河最宜稻

汝河 一名激水郛以西為汝郛以東為潞發源於伊陽天息山經汝州過郛縣至襄城始大薄城而行城南門下橫以石橋東流經郛城收澧河塘河至周家口東入於淮按汝故道由汝州襄鄆東南至汝南郡由新蔡合洪河入淮元季因水勢泛溢為蔡州害自武陽截斷其流約之使東注水患少寧故陞蔡州為汝寧府而汝水之由舞陽而東者入郛城土人始呼曰沙或傳古之名曰潞也按明一統志在襄城縣南東流入黃河

乾勒河 一名土瀘河在郛城北二十里下流

入潁

瑪瑙河 源出襄城東朱湖潭經臨潁郛城入乾勒河

澧河 在郛城南二里源出魯山東南流經葉縣南又東流經舞陽北至郛城合於汝河

唐河 在郛城南二十里出寶峰龜兒山東北流經郛城南合於澧河

洧曲河 在郛城東南三十里澧河自城東蟠灣渡北流合汝河其東南流者又名洧曲唐吳元濟屯兵之所史所謂蔡之精兵皆在洧曲李愬破之即其地也

小洪河 在長葛源出紫荊山明流十里伏流十里經陳太丘祠東注至洪庇寨入潁水

淇河 在長葛西北二十五里源出新鄭東南流入長葛東北入雙洎河

大呂河 在禹州西南明巡道曹公所開

玉寨河 在密縣東北五十里南流四十里入洧水

洧水 源出密縣東南馬嶺山中超化寺東之金花泉縱廣二畝泉源湧出山址東北流受綏水又東受滴瀝泉水又東南受承雲二水又東受馬關水又東至新鄭縣與潞水並流東至長葛合流是為雙洎河明孫元貞詩二水並東注映帶城南北往來行路人病涉今猶昔緬懷乘輿濟存心惠為德古道誰復然川流日不息

漆水 一名潒水源出密縣東南平地一云出雞絡塢東南流經故郛城西為柳泉水又南注

於洧並流而東按明一統志東北至新鄭縣與洧水合

緩水 出密縣大方山緩谿流經漢弘農張伯雅墓復東南逕上郭亭即今之上郭圖東南注洧

馬關水 密縣東南五十里源出七敏山漸入於洧

鄭水 源出鄭州東二十五里東北至中牟縣溉田千餘頃其水下入於汴

小金水河 一名泥河在鄭州西一里源出梅

山北黃龍池東北流至州西如襟帶以其來自金方故名乃鄭水之西派東北達舊渠與蔡城水合總名鄭水

京水 源出滎陽嵩洛山經鄭州西南十五里東流入鄭水唐祖詠詩前路入鄭郊尚經百餘

里馬煩時欲歇客歸程未已落日桑柘陰遙林烟火起西還不遑宿中夜渡京水

須水 源出滎陽南萬山東流經縣北境合索水達於汴

索水 源出滎陽南小徑山清水嶺之聖水池北流入京水合汴左傳韓宣子入楚鄭子皮子

太叔勞諸索水史記楚漢大戰京索間皆在此賈峪河 在滎陽東南四十里源出賈谷山流

經縣東入於索水

五通河 在滎陽西南五里其源出土溝流經縣北入索水

滎水 發源於濟源王屋山巖從高注下既見

而伏東出濟源縣由溫入河伏流溢爲滎禹貢導汎水東流爲濟入於河溢爲滎榮澤之得名以此今無水成平地

旃然河 源出河陰南二十里流經縣北五里廣武山麓逶迤東流經榮澤達於河

汜水 在汜水縣西一里源出鞏縣玉仙山北流經古嶠關東入黃河謂之汜水者取水決復入之義史謂漢高祖即位於汜水之陽是也按

明一統志源出汜水縣西方山東南入黃河竹川 在汜水縣南十五里有竹叢生其西即

舊太溪泉也至寒戰山同棘寨河水耿家河共入汜水出玉門合洛河水達於河

會岡湖 在扶溝縣東北

東湖 一名秋湖在許州東二十五里西湖 有二一在鄆陵縣城西周二里一在許

州城西北周九里宋鄭浩詩綠荷香滿草阡阡流水滌洞萬里田鳥陣雲盤接楚地嵐屏錦帳

對嵩天歌聲縹緲疑杭月曲唱幽篁傍許烟薰得游人真醉處汴州景色自長年宋蘇軾詩西

湖小雨晴灑灑春渠長來從古城角夜半傳新響使君欲秦游浚沿役千掌紛紜具畚鍤開若

蟻運壤天桃弄春色生意寒猶快惟有落殘梅標格若矜爽游人空已集挈榼三且兩醉客臥

道傍扶起尚偃仰池臺信弘麗貴與民同賞但恐城市歇不知田野愴潁川比不登野氣長蒼

莽誰知萬里客湖上獨長想雲間馮樾詩上已蕭條興不孤扁舟殘日渡西湖梨花兩岸鶯啼

落攜酒尋碑憶大蘇

南湖 在商水縣南廣四里

北池湖 在商水縣城北十五里聚穀濟聚子

雙溝五河之水方四十里東流入陳州境達於淮

黃渡湖 在儀封縣北堽陽鄉周圍六十里

回湖 有二俱在鄭州城東三十里東西相連自祭城以入中牟縣逕逕達於河

柳湖 有二一在陳州城北一在新鄭縣西北三里

金明池 在府城西鄭門外西北周迴九里餘見古蹟

龍女池 在鄆陵縣南

五龍池 在原武西門外

白龜池 在陳州城內東北相傳伏羲干蔡水得白龜遂以名池

東門池 在陳州城內東北隅詩陳風東門之池可以沤麻即此按明一統志水至清不生草木

蛟龍池 在襄城北二十里按明一統志左傳鄭大水龍鬬於時門之外涓淵即此

崑崙池 在禹州西南神后山頂

鳳凰池 在禹州治東北

黑龍潭 在密縣西香谷山元至正間縣人禱雨於此有黑龍見故名

清水潭 在延津縣西十里廣二十畝

五子潭 在太康縣西北二十里

朱湖潭 在襄城東三十里瑪瑙河出於此
樞澗 在許州西南三十里世傳漢蔡順遇赤
眉於此

鏡泉 在按察使司署西味甚甘康熙三十三年新濬

青龍泉 在洧水縣西北流經東南二十里入
雙洎河曲阜李王詩誰鑿雲根沁冷水琤琤悠
雅接天聲平灘滴瀝絃鳴急曲岸潺湲玉漱輕
日逐松風驚野夢夜隨漁鼓過孤城年光流盡
無人識我傍長干欲濯纓

禁溝泉 在禹州西一里其水甚甘戰國時韓
王禁人取即此

馬跑泉 在禹州城東北四十里世傳漢光武
駐兵於此馬跑地得泉

靈泉 有二一在禹州北靈泉里平地湧出南
流入潁一在滎陽縣東北二十五里流合須水

緩泉 在禹州城東司馬里流逕長葛縣界合
固店河

湧泉 在禹州玲瓏山谷中湧出東流入潁水
甘露泉 在密縣龍巖寺東水味甘美

滴瀝泉 在密縣天仙廟前石澗水出滴瀝如
雨晝夜不息李芝蘭詩玉女臨妝傾浴盆潑通

地脈潤靈根虎跑仙徑泉翻瀉龍下天門珠亂
噴晴日無雲常自雨炎天有暑不知煩坐來一

吸清涼沁滌盡塵囂羨異源邑令李鵬鳴詩拳
崖懸泉驪龍守掌擲珠光不見口碎帶碧泓誰

敢拈盤陰幻溜銀牀杳忽若漏屋補煉石幾年

會試女媧否太掖仙人摘曉星倒看青天小如
斗上有黃帝千尺松種松上此施大手流霜獨
活元冰鳴收雨雨師收不走聲聲滴瀝復聲聲
年年滴瀝巖壑清

金花草 在密縣東南超化寺清水之源土人
引以溉田數百頃

神井 在杞縣西北每歲禱雨輒應

龍井 在尉氏縣南嶽寨堡按明一統志世傳
金時有石如羊首自天而墜遂成井歲旱禱雨
輒應

漆井 在鄆陵縣西七里漢陳寔祠前

琉璃井 在儀封縣西五里

靈井 有二一在許州城西三十里其色元而
氣溫積雨不溢久旱不涸一在鄭州東三里李
衛公祠後

聖水井 在禹州義讓里按明一統志遇旱禱
雨皆應

湫水井 在禹州北靈泉井二井源泉相通雖
大旱不涸湧亦不溢

靈仙井 在滎陽縣南二十五里靈仙寺前元
祐間龍見於此

琵琶溝 在祥符縣西南以形如琵琶故名
長明溝 源出長葛縣界流經尉氏縣西南匯
有大陂東南入大溝河

鴻溝 在河陰東即楚漢時分界處北接廣武
山與滎澤相連唐韓愈詩龍疲虎困割川原億
萬蒼生性命存誰勸君王回馬首真成一擲賭

乾坤許渾詩相持未定各為君秦政山河此地
分力盡烏江千載後古溝芳草起寒雲宋呂蒙
正詩溝中流水已成塵溝畔荒涼起暮雲大抵
關河須一統可能天地更平分烟橫綠野山空
在樹倚高原日漸曠方凭征鞍思往事數聲風
笛馬前聞

五梁溝 在陳州西南二十五里溝有五橋故
名

陳佗溝 在陳州城北二十里相傳為陳公子
佗所開

三山陂 在府城西北五里明李夢陽詩崔嵬
艮岳他年笑寂寞三山後代思湖色春光淨滿
眼古城風暮幾人悲

僕射陂 在鄭州城東南四里後魏孝文帝以
此陂賜僕射李冲後人因名唐元宗更名廣仁
池

圃田澤 在中牟縣西北七里周職方豫州藪
曰圃田即此其澤東西五十里南北二十六里
西限長城東極官渡高者可耕澤者成匯今為
澤者八若東澤西澤之類為陂者二十有六若
大灰小灰之類其實一圃田澤耳

激水 府志無按明一統志在鄆城縣有大小
二水大者在縣治南一里小者在縣治北一里
隋激州以此水名

甘泉井 府志無按明一統志在府城內明魏
國公徐達故宅洪武間河水入城諸井苦不可
食未樂初忽湧此泉色瑩而味甘因名

八角井 府志無按明一統志在府城西南水苦不可飲宋劉敞詩誰鑿八角井不方亦不圓此地饒美水此井獨苦泉甘常不竭泉苦更末年浪得世上名對之還慨然

冰井 府志無按明一統志在延津縣西南二十里世傳韓襄王藏冰之所明越應揚詩飲水思源歌帝力冰壺玉鑑碧璘璘不綠深有甘棠澤那得延津萬井春

厄井 府志無按明一統志在汜水縣東南七十里風俗通云漢高祖與項羽戰敗於京索遁入此井鳩止鳴其上追者以爲無人遂得脫因名

鳴井 府志無按明一統志在陳州城東三里以物投下聲應如鐘

龍華井 府志無按明一統志在許州城北

蓬池 府志無按明一統志在府城東北本春秋之蓬澤後因爲池晉阮籍詩徘徊蓬池上回首望大梁唐元宗改爲福源池禁魚採

黃池 府志無按明一統志在封丘縣南一十里春秋公會吳子於黃池卽此

凝碧池 府志無按明一統志在府城東南平臺側唐爲牧澤宋眞宗時鑿爲池後爲河水淤塞

靈池 府志無按明一統志在長葛縣西一名葛仙池世傳吳人葛元寓居於此池有石甃每遇早禱雨輒應

大溝 府志無按明一統志在尉氏縣西南一

十五里東北合康溝入於黃河
筆溝 府志無按明一統志在尉氏縣東北四十里端直如筆故名

驛馬溝 府志無按明一統志在商水縣西南一十三里其端急如驛馬因名

濞堤 府志無按明一統志自府東至歸德府三百餘里世傳漢梁孝王徙都睢陽時所築今俗訛爲蓼堤

金堤 府志無按明一統志自滎陽縣東至千乘海口千餘里歷代築之以禦河患通謂之金堤漢孝文時河決酸棗東潰金堤卽此

隋堤 府志無按明一統志在汴河故道隋煬帝所築

湛渠 府志無按明一統志在府城外唐載初元年引汴水注白溝以通漕

牽渠 府志無按明一統志在鄭州界內魏牽招爲廣武太守時郡城井苦不可食始爲鑿渠引城外清泉注之民以爲便因名

欽定古今圖書集成方輿彙編職方典

第三百七十二卷目錄

開封府部彙考三

開封府河防考

職方典第三百七十二卷

開封府部彙考三

開封府河防考

府志

唐虞

禹導河自積石歷龍門至於華陰始入河南地

自成阜始入開封地

漢

文帝十有二年冬十有一月河決酸棗東潰金

隄

是歲東郡大興卒塞之

成帝綏和二年詔求能浚川疏河者待詔賈讓
上言治河有上中下策古者立國居民疆理土
地必遺川澤之分度水勢所不及大川無防小
水得入陂障卑下以爲汗澤使秋水多得有所
休息左右游陂寬緩而不迫夫土之有川猶人
之有口也治土而防其川猶止兒啼而塞其口
豈不遽止然其死可立而待也故曰善爲川者
決之使導善爲民者宜之使言蓋隄防之作近

起戰國壅防百川各以自利齊與趙魏以河爲
境趙魏瀕山齊地卑下作隄去河二十五里河
水東抵齊隄則返而西泛趙魏趙魏亦爲隄去
河二十五里雖非其正水尚有所游蕩時至而
去則填淤肥美民耕田之或久無害稍築室宅
遂成聚落大水時至漂沒則更起隄防以自救
稍去其城郭排水澤而居之湛溺自其宜也今
隄防陞者去水數百步遠者數里於故大隄之
內復有數重民居其間此皆前世所排也河從
河內黎陽至魏郡昭陽東西互有石隄激水使
環百餘里間河再西而東迫阨如此不得安息
今行上策徙冀州之民當水衝者決黎陽遮害
亭放河使北入海河西薄太山東薄金隄勢不
能遠泛濫期月自定難者將曰若如此敗壞城
郭田廬塚墓以萬數百姓怨恨昔大禹治水山
林當路者毀之故鑿龍門辟伊闕折底柱破碣
石墮斷天地之性此乃人功所造何足言也今
瀕河十郡治隄歲費且萬萬及其大決所殘無
數如出數年治河之費以業所徙之民遵古聖
之法定山川之位使神人各處其所而不相奸
且以大漢方制萬里豈其與水爭咫尺之地哉
此功一立河定民安千載無患故謂之上策若
乃多穿漕渠于冀州地使民得以溉田分殺水
怒雖非聖人法然亦救弊術也今可從淇口以
東爲石隄多張水門恐議者疑河大川難禁制
榮陽漕渠足以小之其水門但用土木今作石
隄勢必完安冀州渠首盡當仰此水門諸渠皆

往往股引取之旱則開東方下水門溉冀州水
則開西方高門分河流通渠則填淤加肥故種
禾麥更爲秣稻轉漕舟船之便此三利也民田
適治河隄亦成此誠富國安民與利除害可支
數百歲故謂之中策若乃繕完故隄增卑倍薄
勞費無已數逢其害此最下策也
明帝永平十有三年夏四月詔修汴渠隄
初河汴決壞久而不修建武十年光武欲修之
後儀令樂俊上言民新被兵革未宜興役乃止
其後汴渠東浸日月彌廣兗豫百姓怨嘆會有
萬葉浪王景能治水者帝問理水形便景陳利
害應對敏捷帝甚善之乃賜山海渠書禹貢圖
及以錢帛發卒數十萬詔景與將作謁者王吳
治汴渠隄自滎陽東至于乘海口千有餘里景
乃商度地勢鑿山開澗防遏衝要疏決壅積十
里立一水門令更相迴注無復潰漏之患明年
渠成帝親巡行詔濱河郡國置河隄員吏如西
京舊制景由是顯名王吳及諸從事者皆增秩
一等
順帝陽嘉二年詔自汴河口以東緣河積石爲
鄧郛成刻石記之
唐元宗十有四年河決魏州
五代漢乾祐三年夏六月河決鄆州補闕盧振
上言臣伏見汴河隄西岸隄堰不牢每年潰決
正當農時勞民役衆以臣愚見汴水訪河故
道陂澤處置立閘門水漲溢時以分其勢即澇
歲無漂沒之患旱則獲澆溉之饒庶幾編氓差

免勞役

周太祖廣順二年十有二月河決鄭州時周主以決河爲患王濬請自行視遂塞之

世宗顯德四年疏汴水入五丈河初導河自開封歷陳留其廣五丈故名又白溝河卽武后載初元年引汴水入白河者也唐末湮塞至世宗始疏濬以通齊魯之舟楫矣

宋太祖乾德三年秋大霖雨河決陽武及孟州詔發州兵治之

太宗太平興國二年秋七月河決孟州之溫縣鄭州之滎澤詔發沿河諸州丁夫塞之視隄岸之缺亟繕治之民被水災者悉蠲其租

神宗十年夏五月河決滎澤詔判都水監俞允往治之八月又決鄭州滎澤

元豐元年河決鄭州原武夏四月丙寅決口始塞詔改曹村埽曰靈平五月甲戌新隄成

五年秋八月河決鄭州原武

哲宗元符三年春二月中書舍人張商英獻治

河五事一曰行古沙河二曰復平恩四埽三曰引大河自古障河入海四曰築御河西隄而

開東隄之積五曰開水門口泄徒駭東流大要欲隨地勢疏浚入海耳

徽宗建中靖國元年春詔修蘇村西隄初尚書

省言自去夏蘇村漲水後來全河漫流今已淤高三四尺宜立西隄詔都水使者魯君貺同北

外丞司經度之於是左正言任伯雨奏河爲中國患二千歲矣自古竭天下之力以事河者莫

如本朝而徇衆人偏見欲屈大河之勢以從人

者莫甚於近世臣不敢遠引祇取元祐末年小吳決溢議者乃譎謀異計欲立奇功以邀厚賞

不顧地勢不念民力不惜國用力建東流之議當洪流中立馬頭設鋸齒稍芻材木耗費百倍力過水勢使之東注凌虛駕空非特行地上而已增隄益防惴惴恐決澄沙淤泥久益高仰一

旦決潰又復北流此非隄防之不固亦理勢之必至也昔禹之治水不獨行其所無事亦未嘗

不因其變以導之蓋河流混濁泥沙相半流行既久遷遲淤澱則久而必決者勢不能變也或

北而東或東而北亦安可以人力制哉爲今之策正宜因其所向寬立隄防約欄水勢使不至

大段漫流若恐北流淤澱塘泊亦祇宜因塘泊之岸增設隄防乃爲長策風聞近日又有議者

獻東流之計不獨比年災傷居民流散公私匱竭百無一有事勢窘急固不可爲抑以自高注

下湍流奔猛潰決未久勢不可改設若興工公私徒耗殆非利民之舉實自困之道也秋八月修陽武副隄

大觀元年春二月詔於陽武上埽開修直河有司言河身當長三千四百四十步面闊八十尺

底闊五丈深七尺計工十萬七千有奇用夫三千五百有奇凡一月畢從之

三年秋八月詔沈純誠開免源渠免源在廣武埽對岸開者欲分減埽下漲水也

宣和元年冬十有二月免源渠成

元世祖至元二十有三年河決河南郡縣凡十有五處役民二十餘萬塞之二十有五年汴梁路陽武縣諸處河決凡二十有二所命宣慰司督夫修治

大德元年秋七月河決杞縣蒲口先是河決汴梁發丁夫三萬塞之至是蒲口復決乃命河北河南廉訪使尚文相度形勢爲久利之策文言

長河萬里西來其勢湍猛至孟津而下地平土疏移徙不常失禹故道爲中國患不知幾千百

年矣自古治河處得其方則用力少而患遲事失其宜則用力多而患速此不易之定論也今

陳畱抵睢東西百有餘里南岸舊河口十一已塞者二自濶者六通川者三岸高於水計六七

尺或四五尺北岸故隄其水比田高三四尺或高下等大槩南高於北約八九尺隄安得不壞

水安得不北也蒲口今決千有餘步迅速東行得水舊道行二百里至歸德橫隄之下復合正

流或強湮遏上決下潰功不可成揆今之計河西郡縣順水之性遠築長垣以禦汎濫歸德徐

鄆民避衝潰聽從安便被患之家宜於河南退灘地內給付頃畝以爲永業異時河決他所者

亦如此亦一時救荒之良策也蒲口不塞使朝廷從之會河朔郡縣山東憲部爭言不塞則河

北桑田盡爲魚鼈之區塞之便復從之明年蒲口復決塞河之役無歲無之是後水北入復河

故道竟如文言按大學士丘濬曰河爲中原大害自古治之者未有能得上策者也蓋以河

自星宿海發源東入中國踰萬里凡九折焉合華彝之水千流萬派以趨于海其源之來也遠矣其水之積也衆矣夫以萬川而歸於一壑所來之路孔多所收之門東隘而欲其不泛溢難矣况孟津以下地平土疏易爲衝決而移徙不常也哉漢唐以來賈讓諸人言治河者多隨時制宜之策在當時雖或可行而今時未必皆便元時去今未遠地勢物力大投相似尚文所建之策雖非百世經久之長計然亦一時救弊之良方也令河南藩憲每年循行汴河郡縣如文所言者相地所宜或築長垣以禦汎溢或開淤塞以通束隘從民所便或遷村落以避衝潰或給退灘以償所失如此雖不能使汴河郡百年無害而被害居民亦可暫時蘇息矣

武宗至大二年秋七月河決歸德又決封丘河北河南道廉訪司言黃河決溢千里蒙害浸城郭漂室廬壞禾稼百姓已罹其毒然後訪求修治之方而且衆議紛紜互陳利害當事者疑惑不決必須上請朝省比至議定其害滋大所謂不預已然之弊大抵黃河伏槽之時水勢似緩觀之不足爲害一遇霖潦湍浪迅猛自孟津以東土性疏薄兼帶沙鹵又失導洩之方崩潰決溢可翹足而待近歲毫穎之民幸河北徙有司不能遠慮失于規畫使被濫悉爲陸地東至杞縣三汊口播河爲三分殺其勢蓋亦有年往歲歸德太康建言相次湮塞南北二汊遂使三河之水合而爲一下流既不通暢自然上溢爲災

由是觀之是自奪分泄之利故其上下決溢至今莫除度今水勢趨下有復鉅野梁山之意蓋河性遷徙無常苟不爲遠計預防不出數年曹濮濟鄆蒙害必矣今之所謂治水者徒爾議論紛紜咸無良策水監之官既非精選知河之利害者百無一二雖每年累驛而至名爲巡河徒應故事問地形之高下則懵不知訪水勢之利病則非所習既無實才又不經練乃或妄興事端勞民動衆阻逆水性翻爲後患爲今之計莫若於汴梁置都水分監妙選廉幹深知水利之人專職其任量存員數頻爲巡視謹其防護可疏者疏之可堙者堙之可防者防之職掌既專則事功可立較之河已決溢民已被害然後鹵莽修治以勞民者烏可同日而語哉

仁宗延祐六年春二月修治汴梁護城隄先是河北河南道廉訪副使言近年河決杞縣小黃村口沿汴南流莫能禦遏陳穎河膏腴之地浸沒百姓流散今水迫汴城遠無數里僅值霖雨水溢倉卒何以防禦方今農隙宜爲講究使水歸故道達于江淮不惟陳穎之民得遂其生竊恐將來浸灌汴城其害匪輕於是大司農司下都水監移文汴梁分監修治自六年二月十一日興工至三月九日工畢
七年秋七月河決榮澤遣平章站馬赤親修築奉定帝泰定一年夏五月河溢汴梁樂利隄詔發丁夫六萬四千人築之
順帝至正十有一年夏四月命賈魯爲總治河

防使冬十有一月諸隄埝成河復故道

至正四年夏五月天雨二十餘日黃河暴溢水平地深二尺許北決白茅隄六月又北決金隄並河郡邑皆罹水患朝廷憂之遣使體量仍督大臣訪求治河方略九年冬脫脫既復爲丞相請躬任其事帝嘉納之乃命集羣臣議廷中而言人人殊唯都漕運使賈魯昌言必當治先是魯嘗爲山東道奉使宣撫首領官循行被水郡邑具得修捍成策後又爲都水使者奉旨詣河上相祝驗狀爲圖以定二策進獻一議修築北隄以制橫潰其用功省一議疏塞並舉挽河使東行以復故道其功費甚大至是復以二策對脫脫聽其後策議定乃薦魯於帝大稱旨十一年四月初四日下詔中外命魯以工部尚書爲總治河防使進秩二品授以銀印發汴梁大名十有三路民十五萬人廬州等戍十有八翼軍二萬人俱役一切從事大小軍民咸稟節度便宜興繕是月二十二日鳩工七月疏鑿成八月決水故河九月舟楫通行十一月水土工畢諸埝諸隄成河乃復故道南匯于淮又東入于海帝遣貴臣報祭河伯召魯還京師論功起拜榮祿大夫集賢大學士其宣力諸臣遷賞有差賜丞相脫脫世襲答刺罕之號特命翰林學士承旨歐陽元製河平碑文以旌勞績
明洪武七年河決開封詔參政安然塞之十有四年河溢原武祥符中牟守臣以聞上曰此天災也今欲塞之恐勞民力惟防護舊隄勿

重困吾民也

十有五年河決滎陽武

十有六年秋八月戊辰河決開封東月隄自陳橋至陳留潰流數十餘里是月復決杞縣入巴

河命戶部遣官督所司塞之

二十年河決開封城自安遠門入滄沒官民靡宇甚衆

二十有四年河決原武之黑洋山東經開封城北五里又南行至項城經潁州潁上東至壽州

正陽鎮入於淮而故道遂淤

三十年秋八月河溢開封時城三面皆受水將浸及軍儲倉巨盈庫詔令滎陽高阜處築倉庫以待之

以待之

宋欽元年饋運自陳州潁岐口北輪於京時戶部尚書郁新奏言近因淮河至黃河淤淺以致

饋運不通請自淮安用輕舟運至沙河及陳州潁岐口仍以大舟載入黃河復陸運衛河以轉

輸北京上曰可

四年詔修陽武中牟及汴河北隄

八年河南守臣請修汴梁壞城往河決汴梁壞城二百餘丈至是修築上諭工部臣曰汴梁迫

黃河不免衝決之患此國家藩屏之地不可以緩且聞黃河水增三尺其急遣人往視之

九年三月壬午命侍郎張信潛黃河故道先因

河水累歲爲患修築隄防民困敝至是河決

壞民田廬益甚事聞遣信來視信至詢訪故老

得祥符魚王口至中灣二十餘里有舊黃河岸

與今河面平浚而通之俾循故道則水勢可殺

遂繪圖以進詔發河南民丁十萬命與安伯徐

亨工部侍郎蔣廷贊率運米夫同侍郎金純相

度治之仍遣國公徐景昌以太牢祀河神戶部

侍郎古朴以太牢祭河南境內山川時工部尚

書宋禮督工開會通河遂命禮兼董之初朝議

開會通河及浚河南黃河命戶部凡開浚民丁

皆給米鈔及蠲戶內是年租稅於是河南山東

之人聞風而自願効力者甚衆因諭戶部臣曰

開河効力之人賞蠲之惠一如編役民由是益

戴之

秋八月庚戌新港成河復故道是年六月丁未

敕尚書宋禮曰曩命卿等潛黃河故道及築塞

河港以舒民患若卿等其協心併力無懈夙夜

脫民墊溺用副朕委任之意七月己酉河工告

竣凡役民丁十一萬四百有奇自是河循故道

與會通河合而河南之水患息矣八月庚戌禮

等還京皇太子遣人勞視自是無水災者三十

餘年

正統十有三年河決滎澤東過開封城之西南

又東南經陳畱入渦口又經蒙城至懷遠東北

而達於淮焉是時開封府城在河之北矣時汴

水出滎陽火周山合京索須鄭四水東南至中

牟而入於汴尚書石璞侍郎王永和都御史王

文相繼塞之弗績又六年徐有貞治之決口乃

塞

天順五年秋七月河決開封城命工部侍郎薛

遠塞之

六年春二月作石牐成

成化十有四年春黃河決祥符縣杏花營秋七

月河決延津西夏村汎溢七十餘里又明年徙

之縣南

弘治二年命侍郎白昂導河由壽遠淮

六年夏河決黃陵岡遣都御史劉大夏太監李

興平江伯陳銳治之功成命大學士劉健作記

勒石河上

嘉靖五年都御史盛應期疏趙皮寨河弗就應

期吳江人以薦起爲都御史總理河道時工部

郎中柯維熊與之偕維熊言於應期曰上厲精

中興明公起自閒廢宜大有樹立以答休命應

期曰諾乃謀疏趙皮寨支河綿亙數百里以濟

運道是時趙皮寨爲上流其地視河高數尺而

其土又皆沙也隨疏隨淤久之功弗成應期憂

之日夜止宿水次復益夫數萬治之益弗就百

姓怨咨於是應期坐論免歸

三十有二年夏四月遣工部侍郎吳鵬來視趙

皮寨孫家渡二支河初河決曹縣都御史詹翰

欲殺水勢乃上疏請開趙皮寨之支河計役夫

八萬有奇明年都御史胡松上疏請開孫家渡

之支河計役夫六萬有奇二疏俱下河南山東

撫按藩臬臣皆議之

三十八年決判官村都御史章煥塞之

萬曆五年秋八月決劉獸醫口

十五年夏秋淫雨瀧洛沁水泛漲決劉獸醫口

方輿彙編職方典第三百七十二卷開封府部

古今圖書集成

第〇九二冊 之〇七 葉

銅瓦廂荆隆口淮黃合流上以河臣權分乃使工諫常居敬視事疏塞之

二十九年決槐疙疸

四十四年決狼城岡

崇禎九年河決祥符黑岡巡按御史楊繩武治之旬月而竣十五年決黃金壩省城淪沒上發帑金五十萬命工部侍郎周堪廣募夫塞之八閏月河由故道十六年秋九月河決入渦河

皇清順治元年夏河自復故道

四年八月河溢蘭陽決南岸隄百餘丈以民夫補築之

九年河決封丘荆隆口朱源寨全河北徙張秋

運道衝斷

上命總河楊方興督工鑿支河以分之越四載底績十三年築陽武潭口寺堤時河勢湍激攻北岸甚危河臣以有關運道題請飭行估修堤岸調集彰衛懷三府丁夫幫修月堤數道又挑支河引之水復故道

十四年修祥符回龍廟儀封三家莊堤工屢年

修築工費浩繁

十五年修祥符清河集魁星樓等處堤工

康熙元年河決祥符步李寨中牟黃練口村落

數十淪沒殆盡創築月堤二道

十五年河決蘭陽銅瓦廂

二十年築陳畱回河等堤

二十一年大修河南北兩岸堤總河靳輔巡撫

王日藻題請加幫上流堤岸西自榮澤東至歸

德管河道祖文明奉檄修築單騎往來罔間寒暑迄於二十五年先後隄工共五萬六千餘丈經營指畫鼓舞驗勘法良意美用臻厥成至今南北相望屹如壁立開封永賴焉

三十三年築祥符尚陽鎮隄時淫雨連旬黃河水溢尚陽鎮隄將壞民競走高阜避之知府管竭忠冒雨行泥淖中督夫築二十餘里民免漂沒之患及河水退堤內水積爲巨津不可耕復開溝以疏其流貸粟以賑其饑次年麥秋豐登遂爲樂土焉

欽定古今圖書集成方輿彙編職方典

第三百七十三卷目錄

開封府部彙考四

開封府城池考

開封府關梁考



職方典第三百七十三卷

開封府部彙考四

開封府城池考

祥符縣

附郭

府志

唐德宗建中二年創建汴州城節度使李勉建前代失考

周世宗顯德三年增築東京開封府外城周四十八里二百三十三步

宋太祖建隆三年廣皇城東北隅開寶元年增修京畿開封府城

眞宗大中祥符九年增築京師新城

仁宗天聖元年增築京城

神宗元豐元年重修京畿外城

徽宗政和六年改修京畿外城周廻五十里一百六十五步宋史舊城周圍二十里一百五十五步東門二北曰望春南曰麗景南門三

曰朱雀東曰保康西曰崇明西門二南曰宜秋北曰閭闔北門三

以上宋初仍梁晉舊名至太平興國四年改今名新城周圍五十里一百六十五步南門三曰南薰東曰宣化西曰安上東門二南曰朝陽北曰含輝西門二南曰順天北曰金輝北門四曰通天東曰長景次東曰永泰西曰安肅汴河上水門南曰大通北曰宣澤汴河下水門南曰上善北曰通津惠民河水門上曰普濟下曰廣利廣濟河水門上曰咸豐下曰善利上南曰永順其後又於金輝門南置開遠門按夢華錄云東都外城方圓四十餘里城壕曰護龍河闊十餘丈壕之內外皆植楊柳粉牆朱戶禁人往來城門皆甃城三層屈曲開門唯南薰門新鄭門新宋門封丘門皆直門兩重蓋此係四正門皆留御路故也新城南壁其門有三正南門曰南薰門城南一邊東南則陳州門旁有蔡河水門西南則戴樓門旁亦有蔡河水門蔡河正名惠民河爲通蔡州故也東城一邊其門有四東南曰東水門乃汴河下流水門也其門跨河有鐵梁窻門遇夜加開垂下水面兩岸各有門通人行路由拐子城夾岸百餘丈次則曰新宋門次曰新曹門又次曰東北水門乃五丈河之水門也西城一邊其門有四從南曰新鄭門次曰西水門汴河上水門也次曰萬勝門又次曰固子門又次曰西北水門乃金水河水門也北城一邊其門有四從東曰陳橋門次曰封丘門次曰新酸棗門次曰衛州門新城每百步設馬面戰棚密置女牆旦暮修整望之聳然城裏牙道

各植榆柳成陰每二百步置一防庫貯守禦之器有廣固兵士二十指揮每日修造泥飾專有京城所提總其事舊京城方圓約二十里許南壁其門有三正南曰朱雀門左曰保康門右曰新門東壁其門有三從南汴河南岸角門子河北岸曰舊宋門次曰舊曹門西壁其門有三從南曰舊鄭門次曰汴河北岸角門子次曰梁門北壁其門有三從東曰舊封丘門次曰景龍門次曰金水門

金哀宗正大四年浚汴城外壕金都城門十四曰開陽宣仁安利平化通遠宜照利川崇德迎秋廣澤順義迎順常廣智元以後多湮塞元世祖至元二十七年修汴梁城

仁宗延祐六年修汴梁護城堤

明洪武元年重築河南省開封府城自金迄元汴梁外城毀內城存洪武元年取汴梁路改爲開封府置河南省於此始內外甃以礮石設置武衛守之城周圍二十里一百九十步高三丈五尺廣二丈一尺池深一丈闊五丈門五東曰麗景一名宋門南曰南薰西曰大梁北曰安遠東北曰仁和一名曹門各建月城三重角樓四座敵臺八十四警鋪八十一

嘉靖四年重修開封府城太監呂憲修李慶陽碑記萬曆二十八年增建敵樓巡撫會如春建陳所蘊碑記

皇清康熙元年修開封府城自明季崇禎十五年寇決河水灌城城內盡爲泥沙官署悉移外州縣

至康熙元年巡撫張自德布政使徐化成倡屬官捐修城堞一新各門並建應祀廟宇六座守城門房共十五間始移各衙門於省城

二十七年增修城樓角樓巡撫圖興邦修城中市廛輻輳處惟汴橋閣大隅首貢院前關王廟魚市口火神廟寺角隅鼓樓隅爲最盛關廟有五西關馬市街稱首南關次之大鎮店二南四

十里朱僊鎮商賈貿易最盛卽宋岳武穆敗兀木處河北四十里陳橋宋太祖帥師次陳橋驛卽此

三十三年重修南門樓巡撫顧沂修

陳留縣城

漢元符元年建在縣北二十里今故城是漢以前失考

隋大業十年更建陳留城卽今治

明天順二年知縣鄭瞻增築

成化十二年知縣吳肅增築

崇禎八年始甃磚城知縣左懋泰修城周六里三十步高三丈一尺池環之深一丈八尺廣三

丈五尺角樓有十至辛巳流賊墮城繼以河決內外湮沒絕人跡者三年

皇清署縣事章成文葺立垣堞規模粗具焉城中街

八道集市在東西南三關

杞縣城

秦初建雍丘縣城

元復修葺南杞縣城舊城爲河圯鎮守張柔徙治於北二里已復修葺故城號南杞縣卽今治

明洪武三年知縣曹以崇增築杞縣城

宣德三年復修知縣舒謨增大之周九里有奇高一丈五尺廣一丈闊爲七門南門三西門二

東北門各一尋塞東南一門池深一丈闊倍之城內大街九道外爲關廟有市廛

弘治十三年知縣武衢復修

正德四年知縣楊穆復修

十二年知縣曹敏復修

嘉靖十三年知縣王應築重門浚池

二十五年知縣蔡時雍復修三十一年知縣麻瀛復修城三十六年知縣姚汝循修萬曆二十

一年知縣馬應龍復修崇禎八年始改築磚城知縣申佳引修周一千四百丈有奇高二丈七

尺有奇增小西門甃城堡房十餘所尚書孟紹虞碑記

皇清康熙三十三年知縣李繼烈增築

通許縣城

唐始建據舊志無考明洪武五年知縣江允和因舊址築之周九里三十步高一丈八尺廣一

丈三尺池深一丈五尺闊二丈門有四郭四周十里北郭有古城基址不知何代始徙而南以

是爲郭末築七年知縣許希道築堤而城於上成化九年知縣于寬增築未就知縣黎顯繼修

之正德七年教諭任義復修嘉靖七年知縣胡節繕修崇禎八年新築磚城知縣余尚春增修

并修東西二門

皇清康熙三十一年重修署縣事顧昌洛修大街六

日麗政典文末與嚴正雲路仁義新街太康縣城

始建未詳明成化間增築知縣王珣修城周九里三十步高三丈七尺廣二丈二尺池深二丈

闊倍之郭有四正德六年知縣郭思敬修築嘉靖元年知縣侯泰重修崇禎八年始築磚城知

縣李阜修迨壬午焚於流寇埔垣皆圯

皇清順治初年增修知縣田六善修城內大街凡八

有市廛

尉氏縣城

漢始建周六里一百步明宣德六年增築知縣李琦修周七里高二丈八尺池深一丈闊倍之

城六門郭稱之成化十九年培築知縣劉紹建樓浚隍正德六年十四年知縣郭鏗馬璟相繼

修葺嘉靖十六年知縣劉儀重建城門及樓隆慶元年知縣尹吉修城門樓六角樓八甃橋二

萬曆二十五年知縣阮上卿修城池崇禎五年知縣孫游建勳增建甃敵臺七年知縣陳可

續始築甃城十五年署縣事理問孫接武重修皇清順治三年十五年復修知縣衛紹芳高桂修城

內大街日志道曰據德曰依仁日游藝舊有集市今移於四關廂康熙二十二年修西門城樓

時久雨頽圯知縣于國璧重修之

洧川縣城

金興定二年始置縣因宋樓舊鎮城郭濠塹俱仍舊無所修葺按舊志云舊城在縣南十里卽

唐廢洧州基址考隋置洧州治鄆陵唐置洧州